



Broj: 19-11-53236-2/25
Sarajevo, 12.11.2025. godine

Na osnovu člana 15. stav (1) tačka b) Uredbe o dodjeli transfera neprofitnim organizacijama i pojedincima iz Budžeta Kantona Sarajevo ("Službene novine Kantona Sarajevo", br. 22/21 i i 13/22, 21/24 i 10/25), a u vezi sa Odlukom Vlade Kantona Sarajevo o usvajanju Plana i programa podrške žrtvama i porodicama žrtava genocida nad bošnjacima zaštićene zone UN „Srebrenica“ br 02-04-51765-6/25 od 30.10.2025.godine, šef Ureda Vlade Kantona Sarajevo za podršku Srebrenici d o n o s i

U P U T S T V O

Za podnosiocе prijave na javne pozive:

1. Podršku aktivnostima održivog povratka na području jedinice lokalne samouprave Srebrenica,
2. Podršku investicijama na području lokalne samouprave Srebrenica,
3. Podršku održivog povratka roditeljima, djeci, učenicima i studentima na području jedinice lokalne samouprave Srebrenica

(u daljem tekstu: Javni pozivi).

I PREDMET JAVNIH POZIVA

- (1) Predmet javnih poziva je finansiranje/sufinansiranje projekata, programa i aktivnosti održivog povratka na području jedinice lokalne samouprave Srebrenica, investicija na području jedinice lokalne samouprave Srebrenica i održivog povratka roditeljima, djeci, učenicima i studentima na području jedinice lokalne samouprave Srebrenica.
- (2) Javni poziv se raspisuje sa općim ciljem obezbjeđenja pristupa i raspolaganja budžetskim sredstvima na principu zakonitog, namjenskog, transparentnog i efikasnog finansiranja, odnosno sufinansiranja pojedinaca, neprofitnih organizacija i drugih pravnih lica iz Budžeta Kantona Sarajevo, sa pozicije Ureda Vlade Kantona Sarajevo za podršku Srebrenici, te sa posebnim ciljem poboljšanja kvalitete života građana povratnika sa područja lokalne samouprave Srebrenica.
- (3) Shodno ciljevima iz stava (2), prilikom razmatranja pristiglih prijava naročito će se cijeniti kvalitet planiranih aktivnosti i metode provođenja koje su usko povezane sa unapređenjem kvalitete života građana sa područja jedinice lokalne samouprave Srebrenica, kao i one prijave koje imaju razrađen i specificiran budžet sa informacijama o ukupnom iznosu finansijskih sredstava potrebnih za provođenje projekta, iznosu koji se traži od Ureda Vlade Kantona Sarajevo za podršku Srebrenici, iznosu koji se za provođenje očekuje ili koji je već odobren od drugih donatora ili drugih davalaca sredstava (sufinansiranje), iznosu vlastitih sredstava koje će podnosilac prijave sam uložiti u provođenje projekta (sufinansiranje), direktne troškove provođenja projekta razrađene po izvorima finansiranja, te indirektne troškove provođenja projekta. Dakle, sa najvećim brojem bodova bit će nagrađeni oni projekti/programi/aktivnosti koji što konkretnije i neposrednije doprinose poboljšanju kvalitete života stanovnika povratnika sa područja jedinice lokalne samouprave Srebrenica, kao i oni koji imaju što transparentniji i pregledniji budžet.
- (4) Projekti, programi i aktivnosti u kojima nema konkretne korelacije između planiranih sadržaja i poboljšanja kvalitete života građana sa područja lokalne samouprave Srebrenica, kao i oni gdje je budžet naveden paušalno – bez razrade i navođenja pojedinačnih stavki, neće dobiti sredstva temeljem javnog poziva.

- (5) Temeljem javnih poziva 1 i 2 **neće se** finansirati projekti/programi/aktivnosti onih aplikanata koji nisu opravdali niti dostavili finansijski izvještaj o utrošku budžetskih sredstava u cijelosti za odobreni program, projekat ili aktivnost u prethodnom periodu, te, uslijed visokog rizika od kolizije sa pozitivnim propisima prilikom realizacije, infrastrukturni projekti.
- (6) Sredstva za realizaciju finansijskih sredstava po osnovu Javnog poziva osigurana su u Budžetu Kantona Sarajevo za 2025. godinu, na razdjelu Ureda Vlade Kantona Sarajevo za podršku Srebrenici i to: Podršku aktivnostima održivog povratka na području jedinice lokalne samouprave Srebrenica u iznosu 500 000,00KM;
Podršku investicijama na području jedinice lokalne samouprave Srebrenica u iznosu 150 000,00KM;
Podršku održivog povratka roditeljima, djeci, učenicima i studentima na području jedinice lokalne samouprave opštine Srebrenica u iznosu od 1 000 000,00KM.
- Obzirom na utvrđene ciljeve, neće se finansirati oni projekti, programi i aktivnosti gdje je iz priloženog budžeta vidljivo da će najveći dio sredstava biti usmjeren ka isplaćivanju naknada voditeljima projekata, edukatorima i sl., odnosno gdje će sredstva nesrazmjerno biti utrošena za administrativne troškove. Od ukupnog iznosa sredstava namijenjenog za finansiranje/sufinansiranje projekata/programa/aktivnosti po Javnom pozivu, ukupno 5% sredstava može biti izdvojeno za finansiranje i sufinansiranje administrativnih troškova. U slučaju kada se odobravaju sredstva za administrativne troškove, isti moraju biti opravdani, činiti vrlo mali dio ukupne vrijednosti projekta/programa/aktivnosti, a prilikom razmatranja prijave cijenit će se i da su sami administrativni troškovi u što konkretnijoj relaciji sa ciljevima Javnog poziva iz stava (2).

II PRAVO PRIJAVE

Pravo prijave na Javni poziv imaju udruženja građana i fondacije koji su registrovani na području jedinice lokalne samouprave Srebrenica i na području Kantona (podršku aktivnostima održivog povratka na području jedinice lokalne samouprave Srebrenica), privredna društva, obrti, zadruge i gazdinstva sa sjedištem ili registrovanom filijalom na području regije istočna Bosna (podršku investicijama na području jedinice lokalne samouprave Srebrenica) i fizička lica (roditelji, učenici i studenti) koja imaju prijavljeno prebivalište na području jedinice lokalne samouprave Srebrenica (podrška održivog povratka roditeljima, djeci učenicima i studentima na području jedinice lokalne samouprave Srebrenica) u skladu sa odredbama Zakona o posebnim programima Kantona Sarajevo za memorijalizaciju genocida, podršku povratku i razvoju Srebrenice, pomoći žrtvama i porodicama žrtava genocida nad Bošnjacima Zaštićene zone UN "Srebrenica" ("Službene novine Kantona Sarajevo", broj 18/22).

III KRITERIJI ZA DODJELU SREDSTAVA

(1) OPĆI KRITERIJI

Opći kriteriji utvrđeni su članom 15. Uredbe o dodjeli transfera neprofitnim organizacijama i pojedincima iz Budžeta Kantona Sarajevo ("Službene novine Kantona Sarajevo", br. 22/21 i i 13/22, 21/24 i 10/25). Cijeneći odnosnu odredbu, Javnim pozivom utvrđena je potrebna dokumentacija kojom se dokazuje ispunjenje općih uslova, ujedno cijeneći specifičnost Javnog poziva kojim su obuhvaćena oba entiteta Bosne i Hercegovine.

U cilju izbjegavanja nedoumica prilikom prikupljanja i dostavljanja dokumentacije, daju se sljedeća pojašnjenja:

- a) U kontekstu Javnog poziva, "potpisana od ovlaštenog lica" znači da je dokument u pitanju potpisala osoba koja je registrovana za zastupanje udruženja, neprofitne organizacije ili drugog pravnog lica, "ovjerena pečatom aplikanta" znači ovjerena pečatom podnosioca prijave (udruženja, neprofitne organizacije ili drugog pravnog lica) i "ovjerena kod nadležnog organa" znači da je odnosni dokument ovjeren od strane organa nadležnog za ovjeru - prevashodno općinskog organa. U zavisnosti od toga o kojem je dokumentu riječ u nekim slučajevima dovoljan je potpis ovlaštenog lica i pečat aplikanta, dok se za druge pored navedenog zahtjeva i ovjera nadležnog organa. Za određene dokumente, kao što je npr. rješenje o upisu u registar (kopija) traži se samo ovjera nadležnog organa kao dokaz vjerodostojnosti isprave.

- b) **Uvjerenje od porezne uprave o izmirenim poreznim obavezama je dokument koji izdaje porezna uprava i koji ne može biti stariji od tri mjeseca. Odnosni dokument ne može biti zamijenjen ovjerenom izjavom aplikanta da nema neizmirenih poreskih obaveza.**
- c) Kada je riječ o uvjerenju porezne uprave o izmirenim porezima i doprinosima za zaposlene - ukoliko ima zaposlenih, može biti riječ o dokumentu koji se izdaje neovisno od dokumenta iz tačke b) (dva uvjerenja nadležne poreske uprave), a često je odredba koja se odnosi na navedeno obuhvaćena uvjerenjem iz tačke b). Ukoliko uvjerenje porezne uprave iz tačke b) sadrži podatak i o izmirenim porezima i doprinosima za zaposlene, dovoljno je dostavljanje tog jednog dokumenta. Ukoliko međutim aplikant nema zaposlenih lica, neophodno je **uz uvjerenje iz tačke b)** dostaviti ovjerenu izjavu kod nadležnog organa da nema uposlenih i neizmirenih obaveza kojom to potvrđuje.
- d) Dokumentacija iz tački a) i b) (obrazac prijave za finansiranje/sufinansiranje projekta/programa/aktivnosti sa popisom priloga dostavljene dokumentacije i izjava ovlaštenog lica podnosioca prijave) čini sastavni dio dokumentacije javnog poziva i bit će dostupna na internet stranici Vlade Kantona Sarajevo uz tekst javnog poziva i ovo uputstvo.
- e) Obzirom da je jedan od općih uslova i uredno ispunjenje svih obaveza iz prethodno zaključenih ugovora o finansiranju i sufinansiranju iz budžetskih sredstava, utvrđena je obaveza dostavljanja ovjerene izjave o ispunjenju obaveza kako je prethodno opisano. Pored ove izjave, Komisija će izvršiti dodatne provjere kako bi utvrdila da li je utrošak sredstava i izvještavanje izvršeno u skladu sa preuzetim ugovornim obavezama.
- f) Kućna lista iz tačke f) Kriterija za dodjelu sredstava koja je navedena u Javnom pozivu za podršku održivog povratka roditeljima, djeci, učenicima i studentima na području jedinice lokalne samouprave Srebrenica, mora biti ovjerena kod nadležnog općinskog organa uprave.

(2) POSEBNI KRITERIJI

Posebni kriteriji utvrđeni su članom 15. Uredbe o dodjeli transfera neprofitnim organizacijama i pojedincima iz Budžeta Kantona Sarajevo ("Službene novine Kantona Sarajevo", broj: 22/21 i i 13/22, 21/24 i 10/25).

Cijeneći ove odredbe, javnim pozivom utvrđeno je da se uz prijavu dostavlja opis projekta/programa/aktivnosti (maksimalno dvije stranice) koji obavezno sadrži podatke o nazivu projekta/programa/aktivnosti; opisu potreba, ciljevima i ciljnim grupama; planu realizacije projekta – sa naročitim osvrtom na kvalitet planiranih aktivnosti i metode provođenja koje su usko povezane sa unapređenjem kvalitete života građana sa područja Srebrenice; lokaciji projekta, trajanju projekta i osoblju; budžetu, uključujući informacije o ukupnom iznosu finansijskih sredstava potrebnih za provođenje projekta, iznosu koji se traži od Kabineta premijera Kantona Sarajevo, iznosu koji se za provođenje očekuje ili koji je već odobren od drugih donatora ili drugih davalaca sredstava (sufinansiranje), iznosu vlastitih sredstava koje će podnosilac prijave sam uložiti u provođenje projekta (sufinansiranje), direktne troškove provođenja projekta razrađene po izvorima finansiranja, te indirektno troškove provođenja projekta; kratak opis dosadašnjeg iskustva podnosioca u provođenju istog ili sličnih aktivnosti/programa/projekata i očekivani utjecaj i posljedice projekta/programa/aktivnosti, odnosno koje se promjene očekuju od njihovog provođenja.

Ukoliko u realizaciji projekta/programa/aktivnosti učestvuju partneri, navesti njihovo učešće u realizaciji, te njihove kapacitete i dosadašnje iskustvo.

Navedeni opis projekta može obuhvatati maksimalno dvije stranice (odnosno jedan list papira A4 formata). Dostavljanje opsežnijeg opisa projekta neće nužno imati za posljedicu odbijanje prijave, ali vrednovat će se negativno prilikom ocjenjivanja.

Ukupan iznos sredstava koji se može dobiti po Javnom pozivu za podršku održivog povratka roditeljima, djeci, učenicima i studentima na području jedinice lokalne samouprave Srebrenica, ne može preći 2.000,00 KM po svim osnovama.

IV ROK I NAČIN DOSTAVLJANJA PRIJAVE NA JAVNI POZIV

Krajnji rok za podnošenje prijave je 15 (petnaest) dana **od dana objavljivanja Javnog poziva u dnevnim novinama "Oslobođenje" i na web stranici Vlade Kantona Sarajevo:**



Adresa: Reisa Džemaludina Čauševića 1, 71 000 Sarajevo

Tel: + 387 (0) 33 564-403 Fax: + 387 (0) 33 564-404

Web: <http://vlada.ks.gov.ba>

E-mail: podrska.srebrenica@vlada.ks.gov.ba

Početak računanja roka je dakle datum kada je javni poziv objavljen na internet stranici Vlade Kantona Sarajevo i u dnevnom listu "Oslobođenje" (ako je riječ o dva različita datuma, relevantan je kasniji datum objave).

Vlada Kantona Sarajevo koristi društvene mreže za promociju svojih aktivnosti i na njima će se objaviti da je javni poziv raspisan. Datum objavljivanja ove obavijesti na društvenim mrežama je međutim **irelevantno** za računanje roka za dostavu prijava.

Prijava sa odgovarajućom dokumentacijom podnosi se u zatvorenoj koverti na čijoj poledini obavezno navesti ime i prezime podnosioca prijave, adresu, kontakt telefon i može se predati lično na protokol Kantona Sarajevo ili poslati preporučeno poštom na adresu:

KANTON SARAJEVO
URED VLADE KANTONA SARAJEVO ZA PODRŠKU SREBRENICI
Ulica Reisa Džemaludina Čauševića broj 1
71 000 Sarajevo
JAVNI POZIV
sa naznakom:

"Prijava na Javni poziv za podršku aktivnostima održivog povratka na području jedinice lokalne samouprave "
(Ne otvaraj - otvara Komisija)

"Prijava na Javni poziv za podršku investicijama na području jedinice lokalne samouprave Srebrenica"
(Ne otvaraj - otvara Komisija)

"Prijava na Javni poziv za podršku održivog povratka roditeljima, djeci, učenicima i studentima na području jedinice lokalne samouprave Srebrenica
"
(Ne otvaraj - otvara Komisija)

Ukoliko se prijava predaje na protokol Kantona Sarajevo, za računanje rokova relevantan je dan predaje prijave na protokol. Ukoliko se prijava šalje poštom, relevantan je datum predaje pošiljke na poštu (neovisno od toga kojeg dana će se pošiljka zaprimiti).

V OPŠTE ODREDBE

(1) KOMISIJA

Premijer će imenovat komisiju za provođenje Javnog poziva u skladu sa članom 16 Uredbe o dodjeli transfera neprofitnim organizacijama i pojedincima iz Budžeta Kantona Sarajevo ("Službene novine Kantona Sarajevo", br. 22/21 i i 13/22, 21/24 i 10/25). Komisija će se sastojati od tri (3) člana, te jednog lica koje će obavljati administrativno-tehničke poslove za potrebe Komisije. Komisija će postupati shodno članu 17. Uredbe, te u skladu sa odredbama rješenja o imenovanju i poslovnika o radu koji se donosi na prvoj sjednici.

U skladu sa članom 11. Uredbe, predsjednik, članovi komisije i sekretar će prije početka rada potpisati izjavu o nepristrasnosti, povjerljivosti i nepostojanju sukoba interesa, odnosno da su upoznati sa obavezom da tokom cijelog postupka rada u komisiji prijave mogući sukob interesa i traže isključenje iz rada komisije.

Članom 11. stav (3) Uredbe utvrđeno je da mjere za sprečavanje sukoba interesa najmanje uključuju da predsjednik, član i sekretar komisije uključeni u postupke dodjele transfera:

- a) nije lično i/ili članovi njegove porodice (bračni ili vanbračni drug, dijete ili roditelj) nisu zaposlenici, članovi upravnog tijela ili rukovodioci kod podnosioca prijave,
- b) nije povezan na bilo koji način sa podnosiocem prijave ni kod drugih lica (partnerski odnos u provođenju programa i projekta i sl.),
- c) nema materijalni ili nematerijalni interes u odnosu na javni interes i to u slučajevima porodične povezanosti, ekonomskog, političkog ili drugog zajedničkog interesa.

Osim navedenih razloga, premijer će, ukoliko smatra osnovanim i uputnim, i iz drugih razloga koji za posljedicu mogu imati pristrasno odlučivanje i razmatranje pristiglih prijava, isključiti predsjednika, člana, odnosno sekretara komisije za kojeg utvrdi da postoji sukob interesa – odmah po saznanju za postojanje sukoba interesa.

(2) POSTUPAK RAZMATRANJA PRIJAVA

Selekcija prijava koje će biti finansirane/sufinansirane temeljem Javnog poziva utvrdit će se shodno ocjenama članova Komisije. Nakon utvrđivanja blagovremenosti, urednosti i potpunosti prijava, pristupa se razmatranju predloženih programa/projekata/aktivnosti.

Neblagovremene, nepotpune i neredne prijave neće se uzeti u razmatranje.

Svaki član Komisije daje ocjenu prijave u rasponu od 1 do 10. Komisija će prijave cijeliti prevashodno sa aspekta općih i posebnih uslova, a u odnosu na opći i posebne ciljeve Javnog poziva.

Osim dostavljene dokumentacije, Komisija može pristigle prijave provjeravati i na druge načine koje smatra primjerenim (ostvarivanje komunikacije sa drugim organima, web pretraga i slično). O cjelokupnom provedenom postupku Komisija će izraditi izvještaj (koji zasebno obrađuje svaku pojedinačnu prijavu), a o svakoj održanoj sjednici sastavljat će se zapisnici. Izvještaj, zajedno sa svim zapisnicima, dostavljaju se šefu Ureda.

Minimalni broj bodova koji jedna prijava može osvojiti je pet (5), a maksimalan pedeset (50).

Uz rangiranje prijava, Komisija će ujedno utvrditi i predložiti iznose sredstava koji će se dodijeliti za jedan projekat/aktivnost/program. Prilikom utvrđivanja iznosa Komisija će imati u vidu da što veći broj kvalitetnih prijava dobije bar dio finansijskih sredstava neophodnih za realizaciju predloženih aktivnosti. Ukoliko se finansiranje odobrava u djelimičnom iznosu u odnosu na iznos koji se prijavom traži od Ureda Vlade Kantona Sarajevo za podršku Srebrenici, neophodna je potvrda aplikanta da ima mogućnost da realizuje projekat/aktivnost/program. Ova obaveza bit će sastavni dio svakog pojedinačnog ugovora.

(3) IZJAVLJIVANJE PRIGOVORA

Davalac sredstava će obavijestiti pismeno podnosioca čije prijave nisu prihvaćene u roku od 15 (petnaest) dana od dana objavljivanja rezultata. Podnosioci prijave imaju pravo na izjavljivanje prigovora komisiji za žalbe, u roku od 7 (sedam) dana od dana dostavljanja pismene obavijesti, nakon čega davalac transfera donosi konačnu odluku. Prigovor se ne može izjaviti ukoliko dostavljena dokumentacija na javni poziv nije potpuna.

Prigovor se može izjaviti ukoliko aplikant osporava razloge zbog kojih je odlučeno da se odnosnom projektu/programu/aktivnosti ne dodijele sredstva, odnosno razloge zbog kojih mu je dodijeljen manji iznos sredstava od traženih.

Prigovor se izjavljuje u pisanom obliku, sa pozivom na broj obavijesti, uz jasno naznačavanje razloga zbog kojih se osporava odluka davaoca sredstava. Prigovor se dostavlja lično na protokol Kantona Sarajevo ili preporučeno poštom na adresu:

KANTON SARAJEVO
URED VLADE KANTONA SARAJEVO ZA PODRŠKU SREBRENICI
Ulica Reisa Džemaludina Čauševića br. 1
71 000 Sarajevo

sa naznakom:
"Prigovor na Javni poziv"
(Ne otvaraj)

**(4) ZAKLJUČIVANJE UGOVORA I PRAĆENJE PROVOĐENJA
AKTIVNOSTI/PROGRAMA/PROJEKTA**

Za finansiranje/sufinansiranje realizacije odobrenih aktivnosti/programa/projekata zaključit će se pojedinačni ugovori, kojim će se definisati međusobna prava i obaveze ugovornih strana, a posebno način i dinamika korištenja dodijeljenih sredstava, nadzor nad utroškom istih, te neprihvatljivi troškovi, koji se ne mogu finansirati/sufinansirati dodijeljenim sredstvima.

Pojedinačni ugovori bit će prilagođeni svakom konkretnom projektu/programu/aktivnosti.

Svaki ugovor o dodjeli sredstava sa pozicije Ureda Vlade Kantona Sarajevo za podršku Srebrenici sadrži odredbe kojima se utvrđuje obaveza korisnika sredstava da dostavi narativni i finansijski izvještaj o namjenskom utrošku sredstava doznačenih iz Budžeta, najkasnije u roku od 15 dana od realizacije projekta ili aktivnosti. Izvještaj mora sadržavati i ovjeren popis svih troškova, te dokaze o osnovu utroška dodijeljenih sredstava. Kroz analizu i evaluaciju dostavljenih izvještaja Ured će pratiti utrošak dodijeljenih sredstava, odnosno realizaciju projekata, programa i aktivnosti.

Ured će provoditi obavezne terenske posjete korisnika čija je ukupna izloženost riziku utvrđena kao visoka, o čemu će se sačiniti izvještaj.

Ured će prilikom dodjele sredstava obratiti pažnju na eventualne rizike realizacije. Ukoliko su rizici visoki, te bi troškovi kontrole utroška sredstava (angažovanje i realizacija terenske posjete) premašivali iznos dodijeljenih sredstava, odnosno ne bi bili opravdani i srazmjerni, takvim projektima, programima i aktivnostima sredstva neće biti dodijeljena.

(5) OKVIRNI KALENDAR PROVOĐENJA POSTUPAKA

U skladu sa Godišnjim planom javnih poziva Ureda Vlade Kantona Sarajevo za podršku Srebrenici broj: 19-11-53365/25 od 12.11.2025. godine, planirano vrijeme objave javnog poziva je IV kvartal 2025. godine.

Cijeneći prethodno opisane rokove, okvirno se može planirati okončanje postupka po raspisanom Javnom pozivu koncem trećeg kvartala tekuće godine. Trajanje samog postupka prevashodno zavisi od broja pristiglih prijava, broja uloženi prigovora nakon donošenja odluke davanja sredstava, ali eventualno i drugih objektivnih okolnosti.

Za eventualna dodatna pojašnjenja možete se obratiti Uredu Vlade Kantona Sarajevo za podršku Srebrenici na tel. 033/564-403.

**Ured Vlade Kantona Sarajevo
za podršku Srebrenici**



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 564-403 Fax: + 387 (0) 33 564-404
Web: <http://vlada.ks.gov.ba>
E-mail: podrska.srebrenica@vlada.ks.gov.ba